

四庫全書

史部

# 欽定四庫全書

史部

平定準噶爾方略正編卷

三至六

詳校官監察御史臣孫家賢

通政使司副使臣莫瞻菴覆勘

總校官進士臣

朱鈐

校對官編修臣

周厚棟

謄錄監生臣

汪灝

欽定四庫全書

平定準噶爾方略正編卷三

乾隆十九年夏六月丁巳

議備戰馬事宜

陝甘總督永常奏言從前進勦金川安站設撥  
陝省正係經過地方並無再備戰馬之事調撥  
協濟易於辦理此次進勦準夷自哈密至伊犁  
通行三千餘里全資馬力戰馬一項最關緊要

今照廷議按二萬兵備辦內綠旗兵八千需馬  
一萬六千匹滿洲兵例係一兵四馬需馬四萬  
八千匹加以領兵大員及隨帶餘丁共約需馬  
七萬餘匹兩省營馬及駐防各處馬匹全為調  
撥方足此數若再辦理分站設撥則兩省驛馬  
可調者不過一二千匹計潼關至哈密四千六  
百餘里併站安設亦需馬一二萬匹僅及十之  
一二請將歸化城土默特察哈爾黑龍江京城

滿洲兵及新降之厄魯特兵仍令各騎原馬前來沿途皆有供支便於飼餵騎來之馬到甘省後就近分撥各營以備摘撥之數奏入得

旨軍機大臣議奏尋議臣等現議西路進勦兵二萬名內察哈爾兵於本年秋間起程新厄魯特兵及阿拉善兵俱於明春起程由口外行走其西安涼州莊浪駐防兵丁均係乘騎本營馬匹及甘肅安西綠旗兵俱近在該省并令料理車騾

前往惟哲里木兵一千名索倫兵三千名係由直隸河南陝甘一路令照金川之例每五百名一起陸續行走各該省於經由道路安臺設撥逐站更替永常尚未接閱臣等原議以為滿洲蒙古索倫兵一萬二千俱由陝甘行走是以不免周章今據稱兩省營馬約四萬餘匹驛馬共二千餘匹若於明年二月內將附近馬匹調集按站更替撥送則兵數不過四千分送僅止八

起料理原屬從容所有議令各騎原馬之處應毋庸議惟是備戰兵丁馬匹關係緊要現議西路用兵二萬約共需馬五萬匹臣等原議於各處採買馬十六萬匹內撥給該處馬三萬六千匹并於兩省營馬內挑撥二萬四千匹共足六萬之數已極寬裕應令仍照原議以為備戰之用現在料理哲里木蒙古索倫兵設撥遞送自明春至四月時日較寬可以從容辦理並於道

路寬濶之處添雇車騾俾按次進發無悞則營  
驛馬力儘可節省再現議於喀爾喀及內扎薩  
克等處採買馬匹恐尚不敷查青海一帶及附  
近洮岷莊浪等處各番部落俱係產馬之地並  
令設法購買備用奏入

上從之

庚申

命籌辦烏梁海事宜



上諭軍機大臣曰今年春薩喇爾等帶兵驅逐準噶爾之烏梁海等俱已遠避前去今我兵既撤正青草發生之時烏梁海等或仍在遠處逃避或即潛回舊游牧居住未經查辦若仍回原處明年大兵進剿時伊等或暗行送信與準夷或在大兵之後乘間偷竊俱大有關係應即遣兵先為辦理著傳諭策楞等先遣卡倫人等查驗確實俟薩喇爾塞卜騰等到軍營時公同商酌應如何辦理之處詳

悉具奏

戊辰

命將軍策楞等派兵擒拏逃人巴朗等

上諭軍機大臣曰據麒麟保奏稱策凌孟克之子巴朗帶領二百人逃竄伊等係甫經投順之人復又逃亡情殊可惡伊父策凌孟克方赴熱河未回巴朗即背父潛逃其中必有別情著即傳諭策楞等速派弁兵堵截各卡倫路逕即時擒獲詢明實情

將巴朗及同逃之台吉等押解來京其隨從同逃之屬下人等不必治罪仍交與策凌孟克加意約束策凌孟克等前赴熱河原令塞卜騰照看游牧今適因塞卜騰前往麒麟保駐劄處議事之際伊等即行逃竄看來伊平日管轄衆人尚知法紀今又前往軍營著策楞等將朕此旨曉諭塞卜騰令其領兵追擒務期弋獲

壬申

陝甘總督永常疏奏官兵攜帶器械糧餉各事宜得

旨軍機大臣議奏尋議據該督奏稱興師進剿利於火器擬每百名用鳥鎗手七十五名每名於向例帶鉛藥五百出之外再加帶鉛藥三百出砲手五名帶新鑄威遠砲一位弓箭手二十名各佩弓二張梅針箭五十枝隨身插帶戰箭數十枝查現今各處挑選兵丁奉

旨俱令學習馬上長鎗該督按照馬六步四之例於  
各標鎮營揀選驍健令其學習長鎗擊刺之法  
其弓箭器械雖應預備但隨身佩帶總宜輕捷  
便利期於有濟實用至砲位一項舉動輒費駭  
載曠野殊不適用無庸備帶鉛藥亦無庸加添  
仍照例用五百出為率又奏稱領兵官員口糧  
及兵丁進勦口糧俱以六個月計算應備粳米  
一萬一千二百餘石炒麵二百二十五萬觔白

麵七十五萬觔羊二萬隻又領兵官員跟役口糧及滿漢兵丁跟役餘丁口糧應備粟米六千七百石零炒麵及青稞麵一百萬觔零白麵四十萬觔零羊七千八百餘隻再滿漢官員及跟役餘丁亦以六個月計算應支鹽菜銀一十七萬九千六百兩等語查此次進剿與前不同攜帶食物簡省則進攻輕捷行走便利現奉

諭旨北路兵丁進剿應帶牛羊肉乾炒麵棋子可以

隨身備用不必多需馱載交策楞酌量辦理今西路官兵即有應行預備之處亦應簡便攜帶不礙行程方為妥協應令永常劉統勲另行籌辦具奏再議奏入

上諭曰永常議奏進勦官兵器械糧餉摺內裹帶官兵跟役口糧至米麵數百萬觔此係從前岳鍾琪所辦乃相沿綠旗陋習不知岳鍾琪從前已屬失策而此番情形與前更自不同現在準夷內亂相

尋人心離畔以天朝餘力乘機進取正所謂取亂侮亡之時若裹帶米麵數百萬觔馱載前往則兵丁防護不暇何以輕騎進勦且與蒙古交戰惟應仍用蒙古行走之法加以官軍節制足矣若輜重為累不得鼓勇直前反啟準夷窺伺攘奪之心豈非轉資盜糧耶已據軍機大臣等議另行籌辦可將此傳諭知之

丙子



命都爾伯特親王策凌等約束額默根所屬部人

上諭軍機大臣曰據將軍策楞等奏稱厄魯特孟克特穆爾亦同巴朗等潛逃孟克特穆爾乃台吉額默根之兄今孟克特穆爾既逃額默根不便令其仍往游牧著將其屬下人等俱交與策凌等用心照管又

諭曰孟克特穆爾等逼伊屬人翁郭爾同逃翁郭爾不從至於受傷仍勇往擒拏逃竄之密什爾甚屬

可嘉翁郭爾著授為三等侍衛章京剛領兵同翁  
郭爾等奮勇追趕逃人擒其人口而回亦屬可嘉  
著賞給孔雀翎並各賞銀五十兩

秋七月甲申

議撥解軍需銀兩

甘肅巡撫鄂昌奏言軍需備用銀兩必須充裕  
一應撥運腳價及官兵俸賞加薪月餉鹽菜等  
項約共需銀二百二十八萬餘兩現貯司道府

庫銀共一百四十餘萬兩實不敷用請於鄰省酌撥備用奏入得

旨軍機大臣議奏尋議西路進剿兵應行預備糧餉馬駝各事宜先經陝甘總督永常具奏經臣等議以此次進剿與前不同兵糧不須攜帶過多致行走遲滯請交與尚書劉統勲總督永常等另行籌辦鄂昌所奏大略均照永常辦理以致計算甚多但該省軍興之際需用銀兩不妨寬

裕備貯應於山東本年春撥內撥銀二十萬兩  
河南本年春撥內撥銀三十萬兩四川原有貯  
司庫銀六十萬兩又乾隆十五年備貯銀五十  
萬兩應於此二項內撥銀五十萬兩通共撥銀  
一百萬兩再於戶部撥銀一百萬兩交與該撫  
鄂昌備貯應用奏入

上從之

乙酉

準噶爾部人呼濟雅爾來降

命賞給安插如例

丙戌

上諭軍機大臣曰叅贊大臣安崇阿德寧策卜登駐  
劄庫克嶺專為防範逃人乃巴朗脫逃三人尾隨  
往追並未奮身前進即行退回著將三人帶往軍  
營明白質審一面奏聞一面宣諭朕旨將安崇阿  
德寧即行正法以為觀望不前貽誤軍機者戒策

卜登著革去貝勒給與公爵仍留軍前効力行走

戊子

命永常等傳

諭準噶爾貿易夷目

上諭軍機大臣曰永常奏準噶爾貿易夷目阿濟伯克等到卡辦理情形甚屬妥協此時敦多克已將回至安西可即傳諭敦多克伊在熱河時大皇帝所降諭旨已甚明晰並非不令伊等貿易但此番

貿易出自達瓦齊乃欲自比噶爾丹策零是以大  
皇帝不允須俟敦多克回巢傳諭後達瓦齊果能  
一一遵旨恭順懇恩亦不妨仍准貿易即敦多克  
在熱河時加恩賞賚亦係念從前台吉噶爾丹策  
零並不因達瓦齊遣來之故今伊等貿易夷目或  
即回巢或在哈密候信聽其自便若留此守候所  
需米麵口糧准以羊馬換易此亦憐憫伊等衆人  
皆噶爾丹策零舊屬不忍令其饑餓是以格外施

恩即令敦多克將熱河所降諭旨宣諭於阿濟伯  
克等若敦多克業已回巢則但將此旨曉諭著傳  
諭總督永常提督豆斌其如何回奏情形作速馳  
奏並將該夷目等各自居住不得與內地兵役稍  
有交涉該督提等務期加意防維妥協辦理

己丑

命削副都御史麒麟保職

上諭軍機大臣曰麒麟保照看策凌等游牧諸事不



能盡心適因塞卜騰達什丕勒暫離游牧地方麒  
麟保即漫無約束致令巴朗等脫逃又冒昧陳奏  
巴朗等已經拏獲希圖掩飾情節可惡著革職仍  
留章京上効力贖罪

庚寅

命副都統納穆扎爾前往軍營辦理策凌等游牧事  
務

丙申

擒獲準噶爾逃人巴啓等正法

準噶爾新降屬人巴啓齊倫瑚雅克圖庫本等  
先後脫逃潛回準噶爾經將軍策楞等先後派  
人擒獲副都御史麒麟保會同郡王策凌烏巴  
什等審訊請將為首逃人巴啓瑚雅克圖庫本  
即行處斬為從逃人齊倫即行處絞奏入

上從之

丁酉

定邊左副將軍策楞等奏報準噶爾輝特台吉  
阿睦爾撒納來降

策楞等奏言七月初六日阿睦爾撒納等遣其  
部人得本齊卓特巴恰巴彥鄂爾特克至卡倫  
告稱阿睦爾撒納剛多爾濟訥默庫班珠爾帶  
領四千餘戶投順

聖主自博東齊烏英齊而來先遣我等前來送信又  
稟稱阿睦爾撒納舊住處原在塔爾巴噶台地

方達瓦齊遣宰桑奇塔特額布進烏克圖三人  
來侵我等敗之移居於都蘭哈拉達瓦齊又遣  
策凌巴雅爾等來追經阿睦爾撒納敗之於哈  
布河以後宰桑布林來犯亦為我所敗阿睦爾  
撒納與策凌交戰時台吉諾爾布宰桑瑪木特  
宰桑哈薩克錫喇等帶領厄魯特烏梁海兵八  
千名擄我等游牧阿睦爾撒納聞信令其兄扎  
木叅追至額爾齊斯河與諾爾布等交戰諾爾

布等敗回我等即將游牧向內遷移又遇扎那  
噶爾布帶兵堵截扎木叅與之交戰扎那噶爾  
布敗走我等方得前進其包沁扎哈沁人皆已  
逃避只搶得瑪木特屬下得木齊庫克新錫喇  
布六十餘戶及牲畜等物此後並無退兵行走  
四十餘日到此奏入

上諭軍機大臣曰據策楞等奏輝特台吉阿睦爾撒  
納等攜帶眷屬四千餘戶前來投誠阿睦爾撒納

係準噶爾大台吉今與達瓦齊離異輸誠歸順深  
可嘉憫著貝子扎拉豐阿帶乾清門侍衛德善濟  
福等齎賞賚之物前往降旨再令薩喇爾自軍營  
前往迎勞阿睦爾撒納頒以恩賞將來冬令朕自  
盛京回鑾時仍派玉保照管阿睦爾撒納帶至熱  
河令彼瞻仰乘此便道將塞卜騰亦帶至熱河並  
傳諭玉保前往軍營迎勞阿睦爾撒納時暫在彼  
處照管游牧辦理事務俟應來時候諭旨遵行阿

睦爾撒納係何等人相見時有何言辭應詰問之處俱著詳細詰問具奏

命將軍策楞等停止遷移策凌等游牧

上諭軍機大臣曰策楞奏喀爾喀地方寒冷且無貿易請將策凌等游牧移在歸化城大青山以內居住現今巴朗在逃若再如此辦理不但使新降之人驚疑恒擾亦非辦理準噶爾之本意著傳諭策楞令策凌等仍在扎克拜達里克居住毋庸向內

遷移

戊戌

命賞給員外郎唐喀祿副都統職銜會同侍郎玉保  
前往軍營辦理阿睦爾撒納等安插游牧事務  
己亥

議西北兩路軍需馬駝事宜

軍機大臣奏言分送西北兩路軍需馬駝一案  
臣等原議西北兩路共備馬十六萬匹派出大



臣侍衛蒙古王額駙等業經各處採買今卓索  
圖昭烏達兩處馬匹牲畜俱已買齊其餘有辦  
得過半者亦有尚未報到者若待採買齊備始  
議分送則水草荒枯於馬匹無益所有採買未  
得之處現在行文嚴行催取外今將已買馬匹  
酌量兩路分派即令解送查西路應行預備馬  
六萬匹由該省營馬及山東山西解送馬并青  
海等處採買馬匹共三萬五六千匹外應解馬

二萬五千匹伊克招烏蘭察卜兩處與西路相近該二處所買馬二萬匹交該盟長等即派官兵乘水草分起陸續起程解送西路餘俟西林郭勒馬匹買得時於西南交界處就近揀選五千匹一併交與解送伊克招馬匹之扎薩克官兵送至寧夏橫城等處交給其駝隻該處現有七千餘隻約已敷用今永常所奏須用數萬駝隻之處辦理殊未妥協經臣等議駁應俟永常

覆奏到時另議北路所用馬十萬餘匹駝一萬隻除軍營現存馬匹駝隻及交額林沁多爾濟莫爾渾兩處採買共馬六萬六千餘匹駝七千餘隻應用外現在昭烏達卓索圖兩處所買馬二萬一千餘匹并哲里木所買馬一萬匹疾速購買亦令陸續起程解送北路軍營其由內扎薩克各處採買駝羊俱著解送北路備用每一會盟處派扎薩克一員同官兵加意牧養如有

疲瘦倒斃責令賠補若能妥協解送奏明交部  
議叙奏入報

聞

庚子

命籌辦接濟降人事宜

上諭軍機大臣曰據策楞等奏七月初八日阿睦爾  
撒納已進卡倫共兵五千餘名婦女人衆約共二  
萬請簡派大臣帶領蒙古王等照看辦理等語昨

聞阿睦爾撒納歸順已特派侍郎玉保並賞給唐喀祿副都統銜同往料理伊等游牧事務俟玉保到時令同努三得親扎卜等悉心經理阿睦爾撒納領兵至五千餘名人口衆多口糧必至不繼著將軍營所有牲畜及歸化城運到米石併軍營存貯糧餉內酌量動用賞給若必俟奏聞後賞給恐已緩不濟事策楞等即曉諭朕嘉惠伊等遠方輸誠納款之意一面給發一面奏聞再阿睦爾撒納

等帶來牲畜馬匹自必疲乏策楞等亦應善為曉諭令其加意牧放以備明年進兵之用其食用所需牲畜另於軍營預備羊隻內給發亦於軍務有益著將此傳諭策楞舒赫德公司商酌辦理

辛丑

定邊左副將軍策楞等疏奏籌辦安插降人事宜

策楞等奏言現在阿睦爾撒納等來降若安插

在烏里雅蘇台附近鄂爾海西喇烏蘇等處地方令臣等帶兵前進在科卜多等處居住將卡倫展至阿爾台山梁則烏里雅蘇台是通準噶爾大路衝要之處一應糧餉軍器馬匹牲畜俱在週圍近處似此重要地方斷不宜令伊等駐劄又此等新降之人常有逃亡尚屬小事若將明年進兵之事向準夷泄漏則一年之間俱可預備妥協與明年進兵之事有礙且安撫投誠

之人更須從長計議明年準夷事定後自可令其前往舊游牧但亦尚需經理今此一年內養育二萬餘口若照辦理策凌策凌烏巴什等之例支給牛羊等項則喀爾喀地方不能有此寬餘牲畜倘欲給米石則現今存貯以及輓運之米尚不敷明年軍需之用不能支給伊等臣等公同商酌若安插在喀爾喀王策凌拜都卜游牧之南蘇尼特地方與四子等旗接壤地方則



距歸化城張家口獨石口甚近伊等以

皇上賞賜銀兩就近兌換食物甚為便易請俟阿睦爾撒納到軍營日諭以

皇上恩綸照策凌等初到接濟口種之例分給騾馬牛羊挑其可用之兵將阿睦爾撒納等大台吉一并留在軍營令其守候

諭旨外其餘老少子女俱令攜帶接濟口糧即移至所指地方祈

皇上另派通曉蒙古事務大臣前往照管安插辦理  
似此大事臣等理應恭候

諭旨但蒙古地方霜雪甚早若不乘早而行水草一  
枯又至遲滯臣等商酌已定一面陳奏一面俟  
阿睦爾撒納等進卡之後即照此辦理奏入

上諭曰策楞等辦理此事甚屬錯謬阿睦爾撒納等  
係遠方新歸之人豈有將伊妻子如此分散之理  
此必舒赫德意見策楞從而附會耳此旨到時無

論阿睦爾撒納等妻子已經起程與否著即行撒  
回令其會集一處在烏里雅蘇台附近地方游牧  
居住又

諭曰策楞等請將新降阿睦爾撒納等眷屬分駐於  
戈壁以內留其為首台吉及兵丁等於軍營以備  
遣用已將辦理錯謬之處指示斥駁此事策楞舒  
赫德不知是何居心乖張繆戾實為朕所不料即  
云一時錯誤亦不應出乎情理至於此極試思遠

方歸順之人尚未知內地作何安插乃甫經歸命  
即將其父母妻子發遣留伊本身於軍營伊心豈  
有不生疑懼不知將伊眷屬作何發落今策楞舒  
赫德等辦理軍營重務其意只欲安居無事若將  
此等新降之人未經承受朕恩以前即如此處置  
倘或心生怨望激成事端伊二人又將如何辦理  
即為籌畫伊等口糧起見亦當請旨暫為酌撥若  
因口糧一時難至則遷移如許戶口又豈能不支

給牲畜行糧現在更如何辦給乎即或不然俟阿  
睦爾撒納到卡以後公司商議再行奏請亦不為  
遲乃亟亟奏聞且云一面已經辦理聞之實可駭  
異總因策楞舒赫德全無勇往辦事之心一味畏  
蒞怯懦必欲壞國家大事其居心尚可問耶伊二  
人究係何人主見著即明白回奏若以公司商議  
含糊掩飾斷難逃朕洞鑒

定邊左副將軍策楞等疏奏停止往追逃人巴

朗及辦理烏梁海事宜

策楞等奏言臣等與塞卜騰及薩喇爾等商辦  
追趕巴朗及驅逐烏梁海之事據塞卜騰稱今  
距明年進兵時尚有一年倘將烏梁海即行辦  
理達瓦齊得信預備於進兵之事轉無裨益今  
即置烏梁海不辦至我兵到日伊等亦不過圖  
保性命各自逃遁斷無幫助達瓦齊及為送信  
之事現在似可置之不辦至逃人巴朗已潛逃

一月有餘定已回至伊犁達瓦齊處往追必不能及亦可無庸前追薩喇爾亦以巴朗在逃已久追亦無及為言奏入報

聞

癸卯

訓諭將軍策楞等

上諭軍機大臣曰據策楞等奏阿睦爾撒納見努三成袞扎布告稱同伊投降人內有落後千餘戶懇

求遣兵迎接策楞等聞知此語即應速為辦理乃  
奏請俟明年大兵進剿時再行籌辦所見甚屬舛  
謬此等落後之人俟至來年安能保其無意外之  
事阿睦爾撒納懇切求救情實可憫策楞等縱不  
能即行迎出亦應將即往迎接抑俟明年辦理之  
處具奏請旨乃竟顯言推諉一味畏難何以示懷  
柔遠人之意此又必係舒赫德之主見策楞諸事  
隨聲附和伊二人深負朕簡用之恩殊出情理之



外不勝憤恨業經降旨令薩喇爾領兵迎接著速  
傳諭策楞等將此旨令阿睦爾撒納薩喇爾公同  
觀看會商或即帶領阿睦爾撒納之兵給以馬匹  
口糧一同前往但不必令阿睦爾撒納親行並傳  
諭阿睦爾撒納大皇帝念爾初到勞苦暫為安息  
且已遣侍郎玉保前赴軍營帶往熱河召見封爵  
筵宴諸事俱照策凌等之例加恩若親往迎接即  
不能如期瞻仰惟令其差親信台吉宰桑等會同

薩喇爾前往速為迎接其如何議辦之處即行奏聞策楞舒赫德辦理畏怯不堪著嚴行申飭

丙午

命班第為定邊左副將軍革將軍策楞尚書舒赫德職仍留軍營効力

上諭內閣曰舒赫德自去年命往北路軍營所辦諸事動輒乖張其查拏瑪木特擅入卡倫一案有準噶爾扎那噶爾布差人投書詢問舒赫德並不奏

聞請旨竟擅自致書達瓦齊其舉動冒昧實出意外朕彼時降旨嚴行申飭及來京時面加訓諭伊亦自知錯謬因未行治罪嗣因策凌策凌烏巴什歸誠知準噶爾篡奪相仍人心離散實有可乘之機特命策楞為定邊左副將軍並令舒赫德協同辦理舒赫德在熱河面領訓誨指授極為詳明伊二人自到軍營畏葸猜疑毫無籌畫凡所部署事不合機宜即如準噶爾輝特台吉阿睦爾撒納

與達瓦齊結讐為達瓦齊所攻窮蹙來歸乃策楞  
舒赫德於阿睦爾撒結尚未接見即議令將兵壯  
屯駐軍營同來眷屬悉移置於戈壁之南相距數  
千里使其父母妻子分析離居此豈在天理人情  
之內在阿睦爾撒納等甫經歸命焉知天朝將伊  
等分遣安插究屬何意斷不能不生疑畏且並不  
候旨竟稱一面奏聞一面辦理此何等重大事而  
率意妄行乃爾耶至阿睦爾撒納稱有德濟特台

吉率衆一千戶亦傾心向化因為水所阻又阿睦爾撒納之胞兄及其親子為瑪木特所拘並求給與口糧馬匹前往救應接取成衮扎布薩喇爾努三俱以為可行而策楞舒赫德悉堅執不允薩喇爾係熟悉彼處情形之人既以為可行伊二人必欲執拗不知其出何肺腑方今準夷疊遭內亂所屬部落叩關內附者接踵而至此正可以大示懷柔永綏邊境之時策楞舒赫德身膺重寄何顛倒

舛謬至於此極蓋舒赫德因朕有十月間令伊進  
京之旨遂一切苟且辦理其不肯接濟阿睦爾撒  
納者恐致遷延不得歸家之故且前此致書達瓦  
齊一事朕未加重譴又自以同列大臣才具大率  
與彼相若而伊親信已久即辦理不當不過申飭  
議處未有可代其任者策楞雖素性粗率胸無定  
見乃亦竟每事附和毫不顧事理之輕重國家簡  
用大臣寄以專閫重任而乖張僨事如此實為深

負朕恩策楞舒赫德俱著革職若即令回京轉得  
悠然事外適合本心著以閒散在叅贊上効力贖  
罪所有家產俱著籍沒其子特通額舒常俱著革  
職發往黑龍江披甲在京諸子著拏交刑部以為  
大員負恩者戒班第著補授兵部尚書馳往軍營  
署理定邊左副將軍印務

八月癸丑

准派新降厄魯特兵預備赴軍營調遣

上諭軍機大臣曰據策楞等奏稱投誠之輝特台吉  
阿睦爾撒納訥默庫等於明歲進兵時願將伊等  
屬下人內派兵二千三百餘名等語著照所請准  
其派出所派喀爾喀兵原定為六千名著裁去三  
千五百名令其看守游牧

將軍策楞等會同阿睦爾撒納預籌進兵事宜  
策楞等奏言臣等於七月二十日至扎卜堪地  
方見阿睦爾撒納等遵



旨公同籌議明歲進兵之事據阿睦爾撒納等告稱  
現在準噶爾內亂人心離散黃教頽廢若乘此  
機會領兵前進先將包沁扎哈沁人等收服兵  
威遠揚使準噶爾聞風有願投誠者即行收納  
且可乘便將我等同來落後及被擄之人全行  
救出並搶奪牲畜為我屬下人口糧可以過冬  
現在達瓦齊處人雖尚有數萬然並無一材能  
之人衆心瓦解

大皇帝即遣一人前往衆心無不歸附臣等諭以爾等誠心向化到此即請兵進勦以黃教頽廢羣生罹患為念正合

大皇帝聖意聞之必加褒獎各封顯爵俟明年事定後仍令各歸本處安生樂業但今始從遠方來歸尚未瞻仰

天顏

諭旨亦未頒到且爾等屬人未免窮困急須安撫若

即令爾等進兵

聖心亦必不忍今時已七月即領兵前往亦不能直

至伊犁若不遵照

大皇帝諭旨一舉成功稍有聲張使達瓦齊聞信預  
備於事無益自應欽奉

聖旨於明歲進兵方為盡善阿睦爾撒納等咸無異  
辭臣等細觀阿睦爾撒納之意全欲向包沁扎  
哈沁地方乘機搶奪不但可以揚威兼可擄其

牲畜散給屬下人等是以言之太易若遽允其  
請恐今歲不能竣事徒令準夷聞知預為防備  
於明歲進兵大事有礙是以公同商酌今年先  
將阿睦爾撒納等辦理安插仍俟明年各處兵  
馬齊集再行進兵較為妥協奏入報

聞

甲寅

陝甘總督永常奏報夷使敦多克還部其阻留

卡倫外之貿易夷目阿濟伯克等已先期潛行  
回部奏入報

聞

丁巳

命兩江總督鄂容安面領指授赴軍營辦事

上諭軍機大臣曰年來準夷內亂頻仍人心離散屢  
有大隊輸誠內嚮正可乘機辦理永救邊境策楞  
舒赫德遇事乖張怯懦已降旨革職一時未得更

金定四庫全書  
卷三  
替之人因欲令尹繼善前往北路今思尹繼善年  
逾六旬此事亦恐非其所欲辦徒致勉強僨事鄔  
容安年力壯盛勇敢有為一切緊要機宜或尚能  
曉暢克勝此任著速赴行在面領指授所有兩江  
總督印務即著尹繼善兼署

庚申

厄魯特逃人伯克增特正法

定邊左副將軍策楞等奏言伯克增特與巴朗

等同逃旋經擒獲臣等審訊據供出從前巴朗等隨策凌孟克投誠時行至中途即與伊弟巴雅爾黨及宰桑濟爾哈朗達爾扎達瓦那木凱贊卜尼瑪齊崖等潛謀脫逃往投達瓦齊後策凌孟克前往瞻仰

天顏時欲將巴朗巴雅爾黨一同帶往巴朗不願同行是以未去策凌孟克恐伊等脫逃因將巴雅爾黨及宰桑濟爾哈朗達爾扎達瓦齊崖等帶

往臨行時巴雅爾黨將馬二十匹人五戶託巴朗帶領居住且約欲往何處即行帶往明年必來尋覓同居至巴朗逃後囑伯克增特回告巴雅爾黨濟爾哈朗等我現由哈卜塔克拜塔克逃往巴雅爾黨等可即遇便尋來等語伯克增特本與巴朗同逃又為送信勾引他人情殊可惡請將伯克增特在軍營正法其巴雅爾黨等既有商議同逃情事已密咨麒麟保等加意防



範奏入

上從之

壬戌

命停派宣大兩鎮兵丁

上諭軍機大臣曰北路進剿官兵原派三萬名今該處又有新降厄魯特等咸願出力報効合計兵數已屬有餘所有宣大兩鎮砲手兵一千名著停其派往

丁卯

命阿睦爾撒納等移至鄂爾昆等處游牧

上諭軍機大臣曰據策楞等奏現在烏里雅蘇台地方水草漸枯時亦寒冷應照阿睦爾撒納等所請交與努三得親扎卜令伊等移至鄂爾昆塔米爾等處游牧著照所請即令移至鄂爾昆塔米爾等處居住其照管伊等毋庸派努三前往即令舒赫德同得親扎卜前去照管軍營事務舒赫德不必

管理

命賞給阿睦爾撒納等銀兩有差

上諭軍機大臣曰策楞等奏稱明年大兵進勦時阿睦爾撒納訥默庫等各帶伊等兵丁効力行走經朕降旨照伊等所請行阿睦爾撒納等屬下之人新來投誠生計艱窘應賞給伊等辦裝銀兩著即行給與俾得從容備辦阿睦爾撒納照策凌之例賞銀二千兩訥默庫班珠爾照策凌烏巴什之例

賞銀一千八百兩於軍營存貯錢糧內動支即行  
給與其餘台吉等俟到熱河派定出兵之人再行  
賞給

庚午

命賞阿睦爾撒納等牛馬羊隻有差

上諭軍機大臣曰阿睦爾撒納等款闕內附冀受朕  
恩伊等初到聞其生計艱窘牲畜損傷深堪軫念  
著加恩賞阿睦爾撒納牛馬一百匹羊三百隻訥

默庫班珠爾各賞牛馬八十四羊二百隻其餘台  
吉扎木叅等八人俱各賞牛馬二十四羊一百隻  
以資養贍

壬申

訓諭永常預辦明歲軍行事宜

上諭軍機大臣曰永常奏明歲大兵齊集自嘉峪關  
至哈密應分路前往所有沿途道路并挑挖井泉  
以及到哈密後駐劄營盤牧放馬駝廠地均須及

時酌辦以免臨期貽誤等語官兵經過若遇戈壁  
水泉缺少之處它井應用不過偶一為之至於行  
走道路駐劄營盤牧放廠地俱屬隨時辦理之事  
若皆先事周章則於軍行迅速之道轉有未協且  
入夷境之後誰為預先料理此事耶向來綠營習  
氣每於此等事宜經營籌辦騰口說而費筆墨徒  
致行走迂緩總非切要機宜永常此番統率官兵  
正宜一洗綠營積習務為簡捷便利一切隨時隨

地相機辦理總以迅速進行方為允協若仍蹈故習必為厄魯特兵所笑矣將此傳諭永常知之

癸酉

命新降貝勒策凌孟克等往西路軍營辦事

上諭軍機大臣曰從前降旨令貝勒策凌孟克塞卜騰同王策凌領兵一千前往阿爾台策應今思策凌烏巴什訥默庫俱屬年幼策凌孟克係舊人經歷事務若遣往西路於事有益著將策凌孟克遣

往西路在叅贊大臣上行走策凌烏巴什訥默庫  
著照策凌孟克一體在叅贊大臣上行走其從前  
西路派出綠旗兵一萬名內著傳諭永常即行裁  
減三千名

命將軍班第等詳慎防範來降厄魯特人等

上諭軍機大臣曰策凌孟克之子巴朗現在潛逃聞  
伊所屬人等尚有相約同逃之語不可不密行防  
範著傳諭班第等嗣後準噶爾來降之厄魯特等



當於投到時詢明如係策凌策凌烏巴什及阿睦爾撒納等所屬之人即應給與各台吉識認同住倘係策凌孟克所屬之人其中恐有別情或係巴朗等使人暗通消息或係達瓦齊假作策凌孟克之人從中謀為詭詐俱未可定即應嚴加防守遣人送至京師安置不可仍令歸入策凌孟克部內居住致生事端尤須密為籌辦毋令策凌孟克知覺班第等務宜詳慎妥協辦理

乙亥

命永常等籌辦運貯軍糧事宜

上諭軍機大臣曰據陝甘總督永常甘肅巡撫鄂昌奏西路一切軍需糧石已經陸續購辦將次到齊可以轉運哈密等語但思各處調遣之兵明年三四月始陸續到營為期尚遠此時哈密巡防兵丁僅止綠旗及回民人等殊不足恃若將一應軍糧悉行運往哈密堆貯則守禦未免單弱恐準夷狡

點或乘雪前來攘竊轉足飽其所欲雍正八年前  
事可鑒也永常等所辦軍糧宜從容緩運分貯安  
西以內一帶地方俟明歲大兵齊集之際再行運  
往哈密則程途既不甚遠儘可源源接濟而於防  
範之道更為周密

平定準噶爾方略正編卷三

欽定四庫全書

平定準噶爾方略正編卷四

乾隆十九年秋九月辛巳

定邊左副將軍班第等奏報派兵收服烏梁海  
日期

先是將軍策楞等奏言臣等商同阿睦爾撒納  
擬派喀爾喀兵五千五百名阿睦爾撒納訥默  
庫及策凌等兵各五百名共兵七千名於九月

二十日內齊集烏里雅蘇台十月內到科卜多  
探取信息辦理烏梁海若遇阿睦爾撒納之兄  
及伊屬人等即迎接前來若烏梁海遠遁請在  
哈道里海喇圖等處等候相機辦理奏入得

旨策楞等前後所奏總不相符前稱七月內發兵辦  
理烏梁海回時恐為雪所阻推諉誤事今又奏稱  
於九月二十日齊集前往何以與前互相矛盾且  
辦理烏梁海是何大事何必用兵至七千名之多

種種錯悞殊堪髮指此時若已遲悞不如竟俟至  
明年大兵進勦時辦理著傳諭班第等熟籌妥辦  
嗣經班第等奏稱叅贊大臣薩喇爾等業已率  
領所派兵丁出卡前往計此時正與賊游牧臨  
近之時若再往諭令其撤回恐賊衆知覺轉來  
堵截殊多未便現在薩喇爾等於八月二十四  
日領兵前進臣等亦於二十五日自烏里雅蘇  
台起程前往卓克索接應奏入報

聞

癸未

定邊左副將軍班第等疏奏牧放馬匹事宜

班第等奏言明歲進兵所需駝馬牛羊等項現在陸續送到時際冬春湏擇水草好處善為牧放以備臨時應用現奉

特旨派出舒赫德經理臣等復公同商議仍令額林沁多爾濟率同貝勒旺親扎卜等各帶本部落



官兵前往翁金達什和碩地方查收送到馬匹  
牲畜護送緩行其牧放地方查扎卜堪空圭等  
處冬令溫暖水草充足應令在該處牧放以收  
實用奏入報

聞

丙申

侍郎玉保等奏報帶領新降台吉阿睦爾撒納  
等自軍營起程前赴熱河入

觀

丁酉

定邊左副將軍班第等奏報辦理烏梁海情形  
班第等奏言九月初二日有準噶爾烏梁海赤  
倫屬下烏拉克榜博羅索克孔鄂洪胡四人到  
卡倫告稱我台吉達瓦齊令我宰桑察達克車  
根圖布慎雅爾都四人帶領一千餘戶在索郭  
克察罕烏蘇索郭圖博羅布爾噶蘇等處居住

宰桑赤倫帶領二百餘戶在吹地方居住今宰桑遣我等前來懇求仍令我等往舊游牧沙畢勒沙扎海淖爾沙扎海地方居住等語查現在叅贊大臣薩喇爾努三帶兵來卡倫時應將此烏梁海嚴加看守不致洩漏消息並將烏拉克榜等送交薩喇爾等以備詢問薩喇爾努三即會同貝勒青滾雜卜班珠爾等商議帶兵連夜前往經行博托和尼溝地方至初八日分為兩

路薩喇爾同貝子車木楚克扎布公策布登扎  
布厄魯特台吉扎木叅齊木庫爾德濟特帶領  
兵一千八百名在察罕烏蘇地方往擊四宰桑  
游牧努三同貝勒青滾雜卜台吉班珠爾普爾  
普帶領兵一千名在吹阿勒和碩地方往擊宰  
桑赤倫游牧查此烏梁海等性最狡詐今春驅  
逐伊等誑言投順實未歸誠又同瑪木特擄掠  
阿睦爾撒納之妻子並堵截投順

天朝人衆之路尚思仍居舊日游牧情殊可惡理應  
大加懲創以示軍威臣當即諭令薩喇爾努三  
疾速進兵奮擊掠其游牧如遇阿睦爾撒納家  
口即行奪回伊等果畏威投順再行相機酌辦  
奏入報

聞

己亥

命派健銳營兵下一千往西路調遣

上諭軍機大臣曰前將新降厄魯特兵一千名派往西路已降旨令於原派綠旗兵一萬名內裁減三千此外著添派健銳營滿洲兵一千名命往西路再將綠旗兵裁減一千其所派官弁毋庸裁減照舊遣往以備調遣

冬十月丙午

定邊左副將軍班第等奏報勦捕準噶爾烏梁海情形

班第等奏言九月初九日叅贊公策布登扎布等自科卜多河見有烏梁海踪跡即分兵前進擒宰桑車根等屬人三十餘口即率兵追捕獲宰桑車根及其二子厄魯特台吉齊木庫爾德濟特宰桑烏勒木濟伯勒克和特等又擒獲二十餘人續據叅贊大臣烏爾登亦於九月初九日帶兵於索郭克地方接應叅贊大臣薩喇爾薩喇爾先已得勝計擒男婦老少四五十人獲

馬匹牛羊甚夥又據叅贊大臣努三青滾雜卜班珠爾普爾普等帶兵於初八日至喀喇莽羅地方分兵前進於初九日至赤倫所居吹地方奮力往捕宰桑赤倫及其所屬四得木齊家口俱行擒獲又將雅爾都所屬一得秦家口擒獲詢問瑪木特踪跡據稱八月間往額爾齊斯等語現今所得烏梁海戶口約計一千數百口四項牲畜共有數萬臣等伏思此次官兵直抵烏



梁海巢穴將賊人頭目戶口牲畜擒獲無算仰

賴

天威奏功迅速臣等即行文薩喇爾努三等令將科  
卜多河源巴斯庫斯等處居住之烏梁海乘勝  
勦捕仍探聽瑪木特巴朗等信息即行擒拏外  
將現獲之烏梁海等解送內地其恭順投降者  
留其妻子給與度日牲畜居住擒獲子女牲畜  
俱行送入卡倫其阿睦爾撒納屬下被擄子女

今奪回者即行給與奏入報

聞

庚申

命喀爾喀副將軍額林沁多爾濟為西路叅贊大臣  
暫回游牧馳驛來京面領

指授前往辦事

癸酉

定邊左副將軍班第等奏報擒獲準噶爾宰桑

瑪木特等

班第等奏言據叅贊大臣薩喇爾等報稱十月  
十二日遣人哨探得兩瑪木特在布拉罕察罕  
托輝之下游諾海克卜特爾地方居住並知庫  
克新瑪木特家產牲畜俱被通瑪木特掠去應  
先擒通瑪木特再將庫克新瑪木特從前釋放  
背

恩之處一一聲罪曉諭俾知畏服薩喇爾同班珠爾

等率領官兵繞出烏蘭山之後奮勇直入即將  
通瑪木特擒獲并查拏得伊屬下人約計百名  
即尋獲庫克新瑪木特令伊屬下得木齊等招  
撫所部人衆俱各收服叅贊大臣努三等帶領  
官兵前至額里音淖爾喀喇烏蘇地方共擒獲  
扎哈沁包沁噶勒雜特兵一百五十餘人領兵  
居住為首之達什敦多卜亦被擒獲薩喇爾等

遵照

諭旨歷數庫克新瑪木特之罪據伊告稱從前原欲

投順

天朝已遣人告知卡倫侍衛後因節次有事為達瓦  
齊差遣未得其便且我子又在達瓦齊處是以  
未果今正欲將通瑪木特游牧搶奪由奇蘭遷  
至布拉罕進內投誠反被通瑪木特設計將我  
擒拏如果無投降之意如何往搶通瑪木特急  
遷至布拉罕今我等不便在此居住懇請移入

卡倫等語遂將兩瑪木特派員解送軍營將伊等戶口及牲畜等項俱移至庫卜克爾克勒地方安置臣等伏思此次收獲烏梁海之後即欲前進擒拏兩瑪木特緣附近庫列圖嶺雪大難行惟索勒畢嶺一帶路徑尚無大雪可以行走惟恐瑪木特等聞知烏梁海信息逃避遠遁正在商量行止適聞瑪木特移往索勒畢嶺之附近布拉罕察罕托輝地方之信即行進兵而我

兵未進之先庫克新瑪木特已被逼瑪木特擒  
拏其所屬扎哈沁人等俱已離心毫無準備我  
兵前進如履無人之地將兩瑪木特並行擒獲  
此皆仰賴

聖主威福故能尅期集事而準噶爾之背逆相仍不  
煩兵力明歲大兵莅止成功早可預卜奏入

上諭大學士曰班第自到軍營以來辦理諸事俱合  
機宜奮勇果斷是以先經進兵擒獲阿爾台以內

居住之準噶爾烏梁海宰桑三人收戶口千餘今  
復遣兵由彼越索勒畢嶺進至布拉罕之察罕托  
輝額貝和碩地方將準噶爾宰桑庫克新瑪木特通  
瑪木特悉行擒獲收厄魯特兵一百五十餘名我  
兵並未傷損一人此皆班第實心奮勉調遣合宜  
所致深屬可嘉班第著賞給世襲子爵補授正黃  
旗領侍衛內大臣仍賞銀一千兩薩喇爾感戴朕  
恩遇事奮勇効力此次皆由伊首先進取克成此



功尤當加以殊恩薩喇爾亦著賞給世襲子爵補授正白旗領侍衛內大臣又

諭曰此次辦理烏梁海及擒拿瑪木特諸事因策楞舒赫德有心畏縮阻撓軍務是以將伊等革職伊子俱交刑部監禁無知之徒尚有以幼兒為可憫者今班第到軍營以來遵朕諭旨相度機宜奮勉進兵收獲烏梁海二千餘戶詢知兩瑪木特居址奮勇衝寒而進不致一名漏網俱被擒獲則二人

從前畏縮無能種種悖謬之處愈覺可恨伊二人之罪俟班第審明具奏時再行定奪外策楞之子特英額著發往莊浪特勝額發往江寧特清額發往杭州特成額發往西安特松額發往青州舒赫德之子舒寧發往涼州舒安發往成都披甲効力贖罪

甲戌

宣諭中外用兵事宜

上諭大學士曰準噶爾本元朝臣僕竄處西北恃其  
荒遠憑陵番部我

皇祖聖祖仁皇帝三次

親征肅清沙漠

皇考世宗憲皇帝時策妄阿喇布坦父子濟惡仍肆跳  
梁是用

命將出師聲罪致討及朕嗣統當

皇考降旨撤兵之後而噶爾丹策零遵守定界遣使請

安求通貿易朕特加恩俯准以示懷柔迨噶爾丹  
策零物故其子策妄多爾濟那木扎爾為孽兄喇  
嘛達爾扎所殺而喇嘛達爾扎復為達瓦齊所弑  
在喇嘛達爾扎雖承緒不正尚屬噶爾丹策零之  
子至達瓦齊則篡竊亂臣耳乃今年夏間遣使來  
京仍請赴藏熬茶覲然以噶爾丹策零自處試思  
堂堂大清中外一統而夷部亂臣妄思視同與國  
此其逆天悖理為何如耶上年都爾伯特台吉策

凌策凌烏巴什等率衆來降今秋輝特台吉阿睦爾撒納等又舉部內附斯均窮蹙來歸之人朕為天下共主兼覆並載既無拒而不納之理而喀爾喀內地俾此輩數萬衆仰食聚處將來滋生蕃庶亦豈久安善策朕於達瓦齊初無興師問罪之意而事會所至揆之理勢實有不得不從長經理者  
昔

皇考初議撤兵籌畫尚在未定予蒙

召同果毅親王等及軍機大臣

咨度再三並諭以此時不罷兵則成功尚未可期此時若速罷又恐後人以為墮己勞之功彼時予議以當罷為請

聖意乃定二十年來邊圉晏然甲兵不試固朕初心即策凌等始至時朕尚無意及此奈達瓦齊衆叛親離叩關踵至此皆

上蒼默佑有不期然而然者我滿洲舊俗尚義急公一

聞用兵無論老壯咸以不得與為耻承平日久習  
於晏安擐甲執兵衝鋒陷陣不免視為畏途然以  
應行之事值可乘之時而牽於浮論坐失機宜朕  
亦斷斷不肯出此也從前策楞舒赫德辦理北路  
軍務乖張怯懦種種不合皆由存畏難之見思以  
退縮自全是以重治其罪今班第奉命前往奮勇  
果斷旬月之間收獲烏梁海數千戶口牲畜甚多  
又將準噶爾宰桑庫克新瑪木特通瑪木特悉行

擒獲又得戶口牲畜無算使策楞舒赫德於七八月間即能如此其成功豈不更為迅速亦必有不  
僅止於此者班第薩喇爾已俱授為領侍衛內大  
臣並各賞給世襲子爵以為大臣實心任事者勸  
策楞舒赫德應得之罪俟班第議奏到日另行降  
旨其在京諸子及歲者俱發往各省駐防披甲當  
差朕辦理政務信賞必罰一秉至公毫無成見亦  
並不為悠悠之論所奪特將此番用兵始末及在



事諸臣功罪宣示中外知之

十一月丁丑

命侍郎吳達善查看自京至哈密臺站事務

上諭大學士曰明年派往西路官兵經行臺站關係  
緊要已令各督撫派委司道大員於本省專司其  
事但自京抵哈密路經七十餘站必得大臣經理  
屆期著派侍郎吳達善往來查看以專責成

己卯

命續來投誠之台吉阿卜達什歸阿睦爾撒納部內

居住

上諭軍機大臣曰據班第等奏稱同兩瑪木特來歸之克爾努特台吉阿卜達什原同伊弟巴圖爾帶領戶口前來因被哈薩克錫喇人等搶擄暫居扎哈沁地方今因擒獲瑪木特前來歸誠等語阿卜達什原與阿睦爾撒納等同來投順因馬力疲乏不前中途又被劫掠今既輸誠欵附亦當加恩著傳

諭班第酌賞阿卜達什緞疋並照扎薩克台吉職  
銜辦給行糧牲畜歸於阿睦爾撒納部內一并居  
住

癸未

命寬免策楞舒赫德等治罪仍留軍營効力

上諭軍機大臣曰策楞舒赫德俱係身受重恩之人  
乃自到軍營以來畏懦退縮辦事乖謬朕原降諭  
旨令班第取具伊二人供詞奏到日再行治罪今

覽班第奏摺伊二人自認重罪俯首無辭若論軍法當即在軍營正法示衆但朕念其平日差遣奮勉在內廷行走有年著格外施恩免其正法仍留軍前効力贖罪至於明歲大兵進征之時策楞舒赫德俱不必同往所有糧餉事務著派永貴溫福隨同辦理

丁亥

新降輝特台吉阿睦爾撒納等入

覲於熱河

避暑山莊

賜宴賞賚有差

戊子

命加輝特台吉阿睦爾撒納等封號

上諭大學士曰輝特台吉阿睦爾撒納都爾伯特台吉訥默庫和碩特台吉班珠爾等皆準噶爾渠帥嚮慕德化率領二萬餘衆傾心來歸甚屬可嘉應

施恩賞給封號以示懷柔至意阿睦爾撒納封為親王訥默庫班珠爾封為郡王都爾伯特台吉剛多爾濟巴圖博羅特輝特台吉扎木叅齊木庫爾封為貝勒都爾伯特台吉布圖克森額爾德尼羅壘雲丹輝特台吉德濟特普爾普克什克封為貝子輝特台吉根敦扎卜固木扎卜都爾伯特台吉布顏特古斯孟克博羅特和碩特台吉納噶查封為公都爾伯特台吉烏巴什伯勒克輝特台吉伊

什克什克特封為頭等台吉均授為扎薩克管轄  
所部人戶其如何編次旗分佐領補授官職之處  
著該部照例辦理阿睦爾撒納等受朕恩育務將  
各該屬人等慎加約束教養勉供厥職安分謀生  
爾等果能仰副朕心遵循訓旨則永沐朕恩於無  
既矣慎之毋怠

己丑

命陝甘兩省出征官兵預行支給廉餉

上諭大學士曰劉統勲奏請將陝甘兩省出征滿漢  
官兵明年秋季應得養廉月餉移於夏季起程之  
前支領著照所請准其預行支給以裕戎行

新降厄魯特台吉阿卜達什請在軍前効力  
許之

辛卯

命安插隨同巴朗潛逃之沙拜等

上諭軍機大臣曰據班第奏收服扎哈沁人內查出



隨同巴郎潛逃之沙拜等二十五名已咨送納穆  
扎爾令同策凌等查明辦理沙拜等既已投誠又  
同巴郎潛逃情殊可惡亦不必查問即著押解來  
京發往廣東福建炎熱地方安插

壬辰

命侍衛圖倫楚帶同新降宰桑察達克領兵追捕逃  
人巴朗

上諭軍機大臣曰逃人巴朗所在地方詢問新降宰

桑察達克據稱離我前者進兵之地甚近若未避去給兵五百情愿前往擒拏巴郎於進兵時未必不遠避今我兵已回必仍回至原地著派侍衛圖倫楚帶回察達克馳驛前往由軍營揀派兵丁急速前進務期擒獲巴郎以彰國法著傳諭班第等就近選派精兵五百名多給馬匹駝隻再派瑪木特屬下兵二百名預為整備俟圖倫楚察達克到日即行帶領起程

命收服扎哈沁人等不必遷移內地居住

上諭軍機大臣曰班第等奏請將收服之扎哈沁人等遷至內地扎卜堪庫克嶺等處居住此事斷不可行伊等如此辦理者特慮扎哈沁人內有存二心之人潛行逃竄又慮噶勒雜特喀薩克錫喇兵來搶奪之故此皆未審事之機宜所慮殊屬過當我兵未收服烏梁海扎哈沁之前或恐新降人等逃往送信理宜防範今策凌阿睦爾撒納俱已來

降又將烏梁海扎哈沁人等收服準夷全部早有  
見聞不但一二不足信之人逃往原不足惜即使  
洩漏信息彼知我收其屬部明年兩路進兵大加  
征勦不過愈加驚怯耳更有何慮若恐其遣兵搶  
奪即達瓦齊發兵前來若人數不多我兵以逸待  
勞儘堪勦滅即能以大力搶回扎哈沁不過如我  
未收扎哈沁而已於我未為傷損而轉可以試看  
達瓦齊之力量明年易於進兵今方欲辦理準夷

若將投誠之人均如此遷居內地明年進大兵時收服各部又將何以辦理乎著班第等將扎哈沁人等仍令居住齋拉罕地方斷不必移至內地

庚子

訓飭劉統勲鄂昌等

上諭軍機大臣曰劉統勲等奏酌帶賞需一摺內稱準噶爾頭目如果有交納軍器實心向化者應酌予賞賚等語所奏非是準夷投誠人衆所帶軍器

若令其一一交納則是激以使反拒之使不來既阻其向化之心復啟其疑貳之漸焉有如此辦理之法若果應行獎賞則當其率衆歸誠朕自格外加恩如近日北路之阿睦爾撒納等來降何嘗不厚加寵錫如以其投降交納軍器即行議賞則是  
以幣賄誘之來降幾似利其所有而為之矣此從前岳鍾琪等辦理錯繆豈可復踵前弊劉統勲原係漢人軍務非所諳練鄂昌外任年久乃亦漸染

綠營惡習為此陳奏甚屬不合著飭行

十二月丁未

命釋放擒獲噶勒雜特包沁人等

定邊左副將軍班第奏言叅贊大臣薩喇爾隊  
內擒獲準噶爾噶勒雜特包沁人等一百五十  
餘人臣等遵

旨賞給口糧牲畜令叅贊大臣努三曉諭釋放噶勒  
雜特包沁人等叩謝

天恩告稱我等原係被擄之人今蒙

大皇帝格外隆恩放歸回時遍告衆人情願同來歸  
順隨派人加意照看放出卡倫奏入報

聞

戊申

頒發將軍班第等印信

上諭大學士曰班第著給與定北將軍印信其現有  
定邊左副將軍印信著給與阿睦爾撒納永常著



給與定西將軍印信其新鑄定邊右副將軍印信  
著給與薩喇爾

癸丑

定北將軍班第等奏報安插烏梁海及扎哈沁  
人等事宜

班第等奏言臣等派扎薩克一等台吉三都卜  
多爾濟等照看新收烏梁海遷移居住共計新  
收烏梁海四百四十五戶一千六百七十八口

據三都卜多爾濟文稱於十一月初一日行至  
特斯鄂衣渾等處游牧交於和托輝特貝勒青  
浣雜卜旗內照看居住之台吉班扎喇克察等  
用心照看令住於特斯鄂衣渾等處其新收扎  
哈沁人等共六百二十二戶二千三百五十口亦  
叅贊大臣努三照看安插奏入報

聞

甲寅

命議敘收服烏梁海等軍營効力人員

先是奉

旨此次收服烏梁海等効力行走之王公台吉大臣  
官員兵丁等著將軍班第查明請旨議敘其派出  
之察哈爾喀爾喀和托輝特兵丁亦著班第等酌  
量賞賜尋班第等議奏得

旨著賞給班珠爾銀一千兩扎木叅齊木庫爾各五  
百兩德濟特普爾普各三百兩其餘小台吉等各

賞給一百兩其厄魯特宰桑察哈爾總管喀爾喀  
和托輝特台吉等俱分別賞給緞疋銀兩有差復  
奉

旨加青滾雜卜郡王品級車木楚克扎布貝勒品級  
策布登扎布貝子品級阿敏道副都統品級烏爾  
登努三喀爾喀公恭格敦丹等俱從優議敘

丙辰

喀爾喀郡王桑寨多爾濟請在軍前効力

許之

丁巳

定北將軍班第赴京

陛見

命額駙色布騰巴爾珠爾前赴軍營會同阿睦爾撒

納辦理事務

甲子

命劉統勲等籌辦馬匹軍糧事宜

上諭軍機大臣曰現議明歲大兵進剿之前於二月下旬先遣精銳五六千人輕騎前往略地第思兵行馬匹最關緊要現在採買餵養及各營馬匹內臚分壯健足供馳騁者共有若干可否得二萬之數再駝隻臚壯者可得若干著傳諭劉統勲令其密速查明即行馳奏至軍糧一項前令該督暫貯安西一帶以進剿之期尚遠而哈密防兵恐不足恃也今既尅期進剿亦著陸續速行運赴軍營以

備支給裹帶之用並

命總督鄂容安馳赴西路協同劉統勲等公同辦理

乙丑

命減派西路領兵綠營官員

上諭軍機大臣曰西路領兵大員前經派出豆斌等  
四人今綠營兵已經裁減統領無需多員總兵李  
中楷著停其派往其副將以下各員應隨兵數減  
撤者亦著一併減撤

定議出征滿洲蒙古各項兵丁畫一辦給口糧  
事宜

定北將軍班第等遵

旨將出征滿洲蒙古各項兵丁應給口糧酌議畫一辦  
理具奏得

旨軍機大臣議奏尋議班第等查核從前廩給之數  
較今給與察哈爾之項大略相仿惟喀爾喀和  
托輝特之兵因去游牧近比從前較少今應俟



明年各路調兵前來無論滿洲蒙古索倫巴爾  
虎喀爾喀厄魯特俱一例按照定例給與廩給  
令其攜帶炒米炒麵牛羊乾肉並鹽菜銀兩其  
初到軍營守候之時亦照定例每兵一名每月  
支給二十日米一斗六升六合羊一隻鹽菜銀  
一兩五錢至明年進兵時止議給兩月乾糧少  
覺不足現在於二月內先遣哨探兵前往應令  
其帶四月乾糧以資口食其現在軍營之察哈

爾兵每月應給羊三隻查軍營米石甚裕應裁  
去二隻每月給二十日米羊一隻喀爾喀兵仍  
支給羊價銀二兩一錢其聲援之喀爾喀兵丁  
既不進勦仍給羊價銀七錢俱應如班第所奏  
行並行文西路將軍等亦照此畫一辦理奏入  
上從之

庚午

命寬免出征察哈爾兵丁應賠馬匹

上諭軍機大臣曰察哈爾出征兵丁倒斃馬匹甚多  
理應查明著落賠補今據薩喇爾奏稱察哈爾此  
次辦理烏梁海擒拏瑪木特等事往來行走奮勉  
効力著有勞績若喀爾喀去伊游牧甚近行走尚  
易且擄掠牲畜內不無暗行偷竊以抵倒斃之項  
其察哈爾離伊游牧甚遠擄掠牲畜不敢絲毫隱  
匿且倒斃俱屬實情著將察哈爾應行賠補馬匹  
施恩寬免後不得援以為例

辛未

定議各路官兵起程日期

軍機大臣奏言臣等原議派往西路之京城滿洲兵定於明年正月十五日以前起程其索倫巴爾虎哲里木等兵俱隨後接續起程發往北路之京城滿洲兵定於明年二月初起程其黑龍江兵亦隨後接續起程茲據管理順天府府尹劉綸等文稱索倫巴爾虎兵於明年正月初

間即到京城且現議先遣哨探兵前往臣等酌  
議索倫巴爾虎頭隊兵五百名即於正月初三  
日起程每間二日起行一隊其派往西路之京  
城滿洲兵及哲里木兵共二千分作四隊俱接  
索倫巴爾虎兵之後起程前往派往北路之京  
城滿洲兵一千名黑龍江兵二千名分作六隊  
自二月初三日起至十八日止亦間兩日一隊  
陸續起程其在張家口預備分給北路官兵馬

駝事務現止達松阿一人不敷辦理請再派大臣一員前往奏入得

旨張家口備辦馬駝事務著派副都統鄂實前往餘依議速行

癸酉

定北將軍班第疏奏大兵進剿事宜

班第奏言本月十五日臣自烏里雅蘇台軍營起程行至推河見阿睦爾撒納將軍營應辦事

宜悉行曉示并將明年二月間往額爾齊斯等處種地兵丁事宜與之商酌據阿睦爾撒納云明春往額爾齊斯種地應先遣兵一萬占據地方種地牧馬探聽信息觀其形勢如易於進取即進和博克等處居住分種地人一半帶往彼處種地續遣兵二萬在後跟隨乘勢即可前進當準噶爾馬畜疲乏之際不能抗拒易於成功倘俟夏秋進兵彼處馬畜壯健牛乳充足成功

稍難臣告以現在派出征勦之兵已到軍營及附近調取可以如期而至者僅六千有餘其索倫察哈爾等兵俱定於四月內方到馬匹乾糧等項亦不能一時備辦量準噶爾伎倆已窮衆心已叛即率兵數千號稱數萬亦無不可且如近日擒拏瑪木特時不過二三千人彼即驚惶無措可見明年進兵自屬易於成功據阿睦爾撒納云各路所調之兵一時既不能齊集但先



領兵一萬帶往種地察看情形如易於進取則  
乘機而行否則駐額爾齊斯地方牧馬以俟後  
隊然畢竟後隊之兵可以接續乘機進取更為  
妥協再額爾齊斯等處地方原係都爾伯特巴  
玉特等耕種之地取用何處水泉伊等深知應  
令策凌策凌孟克屬下派宰桑一員種地人各  
五十名將兵丁一同帶往教以耕種臣等公同  
商議種地兵丁應先遣往一萬名其後隊續進

之兵二萬名亦即隨後整頓遣往方為有益現在察哈爾喀爾喀厄魯特兵六千餘名及喀爾喀聲援兵內調取一二千名再請於喀爾喀王公等自請帶往効力之兵酌量帶往既無庸官為辦理而一萬之數亦已具足奏入報

聞

平定準噶爾方略正編卷四

欽定四庫全書

平定準噶爾方略正編卷五

乾隆二十年春正月丙子

命尚書公達爾黨阿領兵速赴軍營

上諭軍機大臣曰達爾黨阿帶領索倫巴爾虎兵起程從前原議於四月內齊集軍營今兩路哨探兵改期於二月內前進著傳諭黑龍江將軍綽爾多選派妥人追及達爾黨阿令於所帶索倫巴爾虎

兵內酌挑二三百人親帶過行務於二月內前赴  
軍營其餘兵丁亦令趲行速往

陝西巡撫陳弘謀疏奏沿邊軍臺增派員弁協  
濟馬匹事宜

陳弘謀奏言大兵進剿準夷一應軍機文報俱  
由沿邊軍臺馳送查陝西境內計程九百五十  
五里照雍正七年之例安設正站九臺腰站二  
十臺每正站止派千把總一員專司馳送兼管

腰站事務不免掣肘今擬於正站添派文官一員經管馬匹腰站添派千把總一員分司接遞方得迅速再正站馬三十匹腰站馬十七匹現在雖已敷用但大兵出口以後文報繁多易於疲乏擬於南路各驛馬內酌撥馬匹前赴沿邊一帶每正腰站添馬四匹暫時協濟應差奏入報

聞

丁丑

定軍營大臣奏事名次

上諭軍機大臣曰定邊左副將軍阿睦爾撒納帶領  
哨探兵由北路進勦著叅贊大臣額駙色布騰巴  
爾珠爾郡王品級青滾雜卜內大臣瑪木特奉天  
將軍阿蘭泰一同前進定邊右副將軍薩喇爾帶  
領哨探兵由西路進勦著叅贊大臣郡王班珠爾  
貝勒品級扎拉豐阿內大臣鄂容安一同前進所

有陳奏事件北路著阿睦爾撒納為首西路著薩  
喇爾為首叅贊大臣等俱著並列應奏事件一面  
奏聞一面呈報將軍兩路哨探兵會合一處則令  
阿睦爾撒納為首其續進大隊兵丁到日北路著  
班第西路著永常為首兩路大兵會合一處遇有  
奏事即著班第為首

己卯

命已派出兵扎薩克等無庸復派臺務

上諭軍機大臣曰軍臺雖屬緊要而進兵所關尤重  
今閱額駙色布騰巴爾珠爾奏管臺務名單有調  
往西路之貝勒品級車木楚克扎布出征隊內之  
郡王桑寨多爾濟等著傳諭阿睦爾撒納等所派  
臺務之扎薩克或能託伊親信之人代辦則可若  
必須親往於進兵之事稍有掣肘即另選扎薩克  
辦理其已派出兵之人不必復派臺務

庚辰



命派內務府官一員解棉甲一千件送西路軍營

諭協辦陝甘總督劉統勲嚴飭各員餵養應用馬匹  
上諭軍機大臣曰陳弘謀奏北路解送馬匹中多疲  
乏不足備甘省安臺之用仍就西安督撫標馬及  
挑存留省馬匹挑選解赴甘省應用北路解送馬  
匹既多疲瘦即不用之備戰而安臺遞送兵丁亦  
屬緊要若不上緊餵養脹壯正恐臨期有悞現在  
西路兵丁已於正月初旬陸續起程馬匹關係緊

要著傳諭劉統勲嚴飭承辦各員如緊飼餵以利  
遘行勿致稍有遺悞

辛巳

議平定準噶爾善後事宜

軍機大臣奏言竊惟準噶爾部落遠處絕域騷  
擾隣封自康熙年間兩路設兵防戍用靖邊疆  
數年以來伊部篡奪相尋人人解體策凌阿睦  
爾撒納等各率其屬先後投誠我

皇上怙冒之仁視中外為一體憫其來歸加恩撫恤

仰體

上蒼鴻貺垂機兩路進勦

王師所至刻日蕩平仍令投誠之人各歸游牧照舊  
分封俾得永享太平之福而喀爾喀游牧地方  
愈展生計益豐此誠

聖德覃敷撫綏異域之盛會臣等遵

旨謹將善後事宜條列請

旨一準噶爾平定後將四衛喇特台吉等戶口詳查  
於各台吉內如何給與封爵授為扎薩克及編  
列旗分佐領投立官員之處俟班第等妥議請  
旨外其四衛喇特台吉等雖應指定四處俾各帶屬  
人駐劄但四衛喇特之人皆係散處原無一姓  
之人應令安置各原住附近地方彼時錯處不  
必將一姓之人安置一處一回人等俱原有住  
居耕種之地每歲納貢於準噶爾且有額徵賦

欵今準噶爾底定回人等俱屬臣僕其徵賦概  
行蠲免所納之貢亦俱議減內如吐魯番部落  
原係內地嗣後應將吐魯番回目查出安置吐  
魯番地方俾管轄所屬瓜州居住之額敏和卓  
屬下回人等亦仍移於吐魯番安置一收服之  
烏梁海等既俱編列旗分佐領俟收服汗喀屯  
巴斯庫斯等處烏梁海時亦請編列旗分佐領  
與舊服之烏梁海等一同遷移安置各原地方

將各處掌管之人令班第等揀選俱奏請

旨一扎哈沁人衆現今瑪木特掌管編列旗分佐領  
暫行安置請將瑪木特與扎哈沁人衆安置於  
喀爾喀游牧之外厄魯特台吉等所住地方之  
內則阿爾台以內多一藩籬愈為堅固至包沁之  
人既與扎哈沁人相近亦應令瑪木特兼管奏  
入

上從之

癸未

命查辦和通呼爾哈淖爾等處出征未回官兵及逃

亡者

上諭軍機大臣曰從前用兵和通呼爾哈淖爾等處  
時我官兵征戰未歸或尚有在準噶爾者夫以臨  
陣被擄偷生賊地至大兵蕩平方被查出理應分  
晰明正典刑此內如係兵丁及護軍校驍騎校等  
即照同策凌阿睦爾撒納前來之滿洲等仍給本

人為奴如係大臣官員非微賤者可比若羅卜藏  
丹津巴濟茂海原任歸化城副都統袞布原任叅  
領拉察卜等俱係背叛之人尤為可惡查出時即  
一面奏聞一面派員解送來京毋得令其脫逃自  
盡至額駙策凌之子嗣在伊游牧被虜與臨陣者  
不同如或現在自應請旨辦理喀爾喀內有似此  
者亦照此例其非臨陣被虜自行逃往者亦解送  
來京儻係在彼處所生子孫即照收服厄魯特例



辦理毋庸深究將此傳諭兩路將軍大臣等知之  
臣等謹案信賞必罰乃朝廷馭世之大柄矧  
在軍行激勸所關其用尤不容少假我

皇上於軍營任事諸大臣下逮將校士卒賞罰嚴明  
無微不當如和通呼爾哈淖爾之役其事已  
越數十年而

聖慮周詳申明軍紀於前此臨陣被遮偷生視息之  
徒不令概邀寬典且即其中分別官員兵丁

及本身子孫斟酌情理詳定科條其罪在不赦者固不能倖逃而情尚可原者無不為曲宥至伊犁平定後更

命軍機大臣及部臣等察核和通呼爾哈淖爾出征議敘世職人員裁汰冒濫以昭覈實洵乎

仁至義盡非獨一時之黜陟幽明實足為萬世之訓行法守也已

命叅贊大臣鄂容安酌議平定準噶爾善後事宜并

留心察看薩喇爾

上諭軍機大臣曰爾等所議平定準噶爾善後事宜  
著抄寄鄂容安令其詳察彼處情形應否如此辦  
理或尚有應酌之處即與阿睦爾撒納班第薩喇  
爾瑪木特等會議具奏再新厄魯特等進兵時肆  
行搶掠班第業經奏聞朕亦早已曉諭阿睦爾撒  
納等此次哨探兵前往理宜加意禁止薩喇爾之  
兄現在彼處如伊兄給伊微物及伊屬下人略為

逢迎饋遺可以無庸深究若過分貪取牲隻或擄掠婦女鄂容安即以己意提撕薩喇爾一經指示自當斂戢鄂容安其審擇輕重留心辦理

諭協辦陝甘總督劉統勲安臺送兵事宜

上諭軍機大臣曰劉統勲奏接准廷議西路兵丁於二月先進數千但索倫兵自京至軍營計程八十餘站非兼程疾馳勢難尅期而至擬即日前往甘涼一帶相度各站車驟馬匹情形等語西路先進

之兵係厄魯特及甘涼滿洲兵非索倫兵也原議  
於三月初由軍營進發是二月內即應齊集而索  
倫等兵自京起程長途按站次第前進即使沿途  
車駕無悞亦不能疾馳而至劉統勲此奏似屬誤  
會但第一二起索倫兵業於正月初三等日起行  
較原議已早半月若至陝甘境內再能稍為變通  
酌量趲行令早至軍營更為有益然亦不必改安  
臺站多費周章或致欲速轉遲總以妥協邁行為

善其甘涼等處滿漢官兵俱當及早料理照議分  
起速發聽候調遣所有起程日期附摺奏聞再現  
議大兵到日俱駐巴里坤另摺所奏火藥軍裝口  
糧等項即應運至軍營不必更駐哈密該督可留  
心上緊督率辦理以濟軍資并傳諭鄂容安鄂昌  
等知之

甲申

命定北將軍班第諭阿睦爾撒納庫克新瑪木特等

和衷共事

叅贊大臣額駙色布騰巴爾珠爾等奏言據阿睦爾撒納云庫克新瑪木特通瑪木特等係軍威新收之人而庫克新瑪木特尤巧滑難信從前曾擄我游牧我等先進之兵原為偵探達瓦齊消息如帶新收扎哈沁烏梁海等人前往儻有洩漏恐致債事不如令庫克新瑪木特等在後隊行走臣看阿睦爾撒納情形甚不願與庫

克新瑪木特等進兵奏入得

旨阿睦爾撒納所慮甚是具見伊誠心欲成大功朕  
為欣覽但此摺未到之先朕以庫克新瑪木特老  
成習事於軍前不為無益故降旨令其先行今若  
停止前去未免反生猜疑且伊此際尚屬奮勉即  
或心懷叵測有阿睦爾撒納在彼伊何能為其烏  
梁海之兵著即停其派往復

諭軍機大臣曰阿睦爾撒納因庫克新瑪木特曾據



伊游牧是以不願同行但用人惟期於事有益豈  
可因伊之言即為停止著將原摺并朕批示俱抄  
寄班第令將伊等調劑務同心協力用奏膚功不  
宜稍露形跡

定邊左副將軍阿睦爾撒納等疏奏收獲包沁  
人衆情形及安插事宜

阿睦爾撒納等奏言副都統銜察達克侍衛圖  
倫楚文稱帶兵前至包沁華額爾齊斯地方包

沁人等咸願歸降隨將包沁之宰桑阿克珠爾  
與數得秦人等收獲并通瑪木特家口交公恭  
格敦丹照管居住包沁之得木齊和濟木瑚里  
擒獲噶勒雜特之庫綱詢問巴朗踪跡據庫綱  
稱從前巴朗等在奇蘭居住聞大兵來信即逃  
往阿里克台地方自華額爾齊斯至喀喇額爾  
齊斯奇蘭阿里克台等處其間現有噶勒雜特  
二千餘人又有都噶爾人衆居住察達克現在

領兵前往擒拏巴朗臣等以包沁乃布魯特回人種類與烏英齊博東齊甚近若為日稍久知我兵少難保無虞隨令副都統銜阿敏道酌帶兵一二百名往迎恭格敦丹將收獲包沁人等遷至齋拉罕地方居住並據照管扎哈沁游牧之侍衛蒙固勒等文稱扎哈沁之得木齊瑚爾海齊拏獲跟隨巴朗潛逃之納瑪林詢知巴朗逃時將伊逼勒同逃及到彼處即欲歸降故來

扎哈沁居住數月來並未見巴朗有包沁人顏達什自伊犁來納瑪林向伊詢問據顏達什云在齋爾地方遇見台吉巴特瑪車凌額林沁及阿睦爾撒納之宰桑默克勒齊三人帶領哈薩克兵將我牲口擄去現聞去擒達瓦齊至兵由何路來及已拏獲達瓦齊與否實俱不知臣等以顏達什由伊犁回又途遇哈薩克兵準噶爾現在情形伊必悉知即令阿敏道將顏達什并

察達克等所擒庫綱二人解送軍營詢問準噶  
爾情形以知虛實奏入

上諭軍機大臣曰阿睦爾撒納將新收包沁人等安  
插齋拉罕甚是將來招服噶勒雜特人等亦著照  
此辦理朕從前惟聞阿睦爾撒納征戰甚勇今閱  
伊所奏如令顏達什庫綱前來詢問準噶爾情形  
及發兵接濟察達克等甚合機宜朕深嘉之察達  
克等不費一矢即收服包沁人衆顏達什復稱已

特瑪車凌帶領哈薩克兵往討達瓦齊看來準噶爾內亂計窮力竭我兵神速即可成功今若度量情形可無庸會合西路之兵即揀選精兵數千於二月中旬奮勇深入更覺易於集事著交於阿睦爾撒納酌量辦理察達克此次收服包沁人衆及往擒巴朗等殊屬奮勉其人亦頗誠實除烏梁海兵丁不必派往外伊身及伊所帶曾經効力之烏梁海二十人仍帶領前進可即傳諭阿睦爾撒納

知之隨

命察達克實授副都統圖倫楚為頭等侍衛翁郭爾  
扎木禪為二等侍衛

命賞給散秩大臣通瑪木特治喪銀兩並揀選伊子  
襲職

上諭軍機大臣曰通瑪木特為人誠實恭敬朕甚嘉  
悅是以加恩授為散秩大臣賞賚衣服銀物今聞  
溘遊殊堪軫念著傳諭軍前大臣於軍營錢糧內

支銀二百兩賞伊家屬治喪并揀選伊子襲職再  
伊家屬如在原游牧處著庫克新瑪木特照看或  
欲來察哈爾地方即相依薩喇爾居住并令其加  
意照看

乙酉

命西路將軍等尅期進兵

上諭軍機大臣曰昨降旨令阿睦爾撒納揀選精兵  
奮勇前進相伊接到此旨必尅期進兵其西路大



兵亦應一體趲行前進著將原旨抄寄永常等務期竭力速發迅奏膚功俟到哈密時即將辦理情形覆奏

丁亥

命青海郡王索諾木丹津領兵駐防噶斯

軍機大臣奏言青海郡王索諾木丹津奏請於游牧處豫備兵內帶兵前往噶斯効力得

旨索諾木丹津著帶兵一千名馳驛前往噶斯駐防

如有投誠者即行受降照管相應遵

旨行文辦理青海事務之副都統令於伊等游牧處  
豫備兵一千俟索諾木丹津到彼帶領前往奏入  
報

聞

命賞厄魯特侍衛達什敦多卜副都統職銜前往軍  
營辦事

上諭軍機大臣曰厄魯特侍衛達什敦多卜著加恩

賞給副都統職銜并賞銀一百兩派乾清門侍衛  
德爾森保即帶領馳驛前赴軍營

申諭進兵噶勒雜特事宜

上諭軍機大臣曰阿睦爾撒納等奏察達克圖倫楚  
等據包沁之得木齊和濟木瑚里通瑪木特所屬  
得木齊哈喇勒岱告稱噶勒雜特之宰桑哈薩克  
錫喇都噶爾領兵二千欲擄包沁人衆遂即帶兵  
退回此必包沁人內有陰懷異心者虛為聲揚察

達克等並未詳察即已退兵適為其所愚耳因此  
益見阿睦爾撒納前將包沁人等安置齋拉罕地  
方甚合機宜厄魯特侍衛達什敦多卜係哈薩克  
錫喇一處宰桑都噶爾之兄其戶口尚在噶勒雜  
特今伊情願前往招服噶勒雜特人等并擒拏巴  
朗朕已賞達什敦多卜副都統職銜令其馳驛前  
往軍營此際察達克等雖回不過到齋拉罕等處  
著阿睦爾撒納速諭伊等即於所到處等候達什

敦多卜不必遣包沁兵前往著於努三所管兵內  
再派數百名共備一千交察達克圖倫楚翁郭爾  
扎木禪及達什敦多卜公同帶領前進噶勒雜特  
聞我兵退回必然無備乘此加兵自更易於成功  
阿睦爾撒納即遵朕旨明白曉諭妥協辦理一面  
速行回奏

戊子

申諭防守包沁扎哈沁人等事宜

上諭軍機大臣曰阿睦爾撒納奏察達克等聞和濟木瑚里等告稱噶勒雜特備兵欲擄包沁即行退同阿睦爾撒納以察達克等為和濟木瑚里等所愚所見甚是但伊等何故布散流言著阿睦爾撒納即將和濟木瑚里哈喇勒岱二人拏至軍營嚴審再和濟木瑚里等如此欺誑必包沁人內有心懷叵測者雖已將伊等移住齊拉罕地方仍須加意防範著將扎哈沁之得木齊內揀選親信二人

派往包沁地方於包沁之得木齊內揀選親信二人調至扎哈沁地方俾叅互雜處并曉諭包沁人等此時暫為保護伊等之計事定後仍各歸原處阿睦爾撒納等即遵旨妥辦仍交與喀喇巴圖魯阿玉錫善為防備毋令伊等生疑

協辦陝甘總督劉統勳疏奏籌辦臺站馬匹事宜

劉統勳奏言遞送官兵前議於甘省境內安馬

五臺嗣經臣等籌議恐馬匹不能往來迭送酌用遞更之法馬不如勞而人可馳驅詎北路馬匹不堪不能不將安臺之馬改為戰馬而北路馬匹甫經休養若照原議安臺恐致貽誤勢必逐站備馬須馬四萬二千餘匹現在北路馬匹到臺尚可資用者約一萬六千餘匹此外應雇民間馬騾甚多辦理不易查甘省甘涼西肅一提三鎮馬匹歷年孳生蕃庶其騾馬俱積存厰



內可以騎用者約有六千匹合之北路馬匹共  
得二萬二千匹所少二萬匹向民間馬騾車輛  
雇湊再有不敷則令陝省協濟臣因京兵起程  
在即一面奏聞一面派員前往挨站安設其孳  
生騾馬通行提鎮派員解送再騾馬於營伍殊  
不相宜在驛站則無不可俟用過歸厰後撥存  
一千二百匹則將來塘驛各站遇有倒斃即可  
於此內撥給奏入報

聞

己丑

諭叅贊大臣阿蘭泰等揀選喀爾喀馬匹事宜

上諭軍機大臣曰此次用兵平定準噶爾特為開拓喀爾喀游牧使登衽席乃喀爾喀扎薩克等不甚奮勉求似從前丹津多爾濟者竟無其人即如採買馬匹朕聞伊等部內短少是以令於內扎薩克六會盟處採買特因所買馬匹稍瘦現在出兵不

能得力故差大臣前往衆喀爾喀游牧另行揀選  
伊等勿以從前業稱馬少恐以欺隱得罪致生疑  
懼即此次亦只酌量挑選並非盡行取用況仍照  
數給還現在所給之馬不過略覺欠臆伊等收留  
牧放即可肥壯亦無所捐著傳諭阿蘭泰等會同  
衆扎薩克酌量採取無得刻求有傷伊等生計并  
寄哈達哈阿思哈知之

獎賞定邊左副將軍阿睦爾撒納

上諭軍機大臣曰阿睦爾撒納等奏烏梁海總管赤  
倫欲帶人前往招服汗哈屯之烏梁海人衆隨即  
差伊前往阿睦爾撒納辦事果斷毫無猶豫朕心  
甚為欣悅著將朕所帶荷包一對賞阿睦爾撒納  
并於彼處錢糧內賞給銀一千兩再傳諭阿睦爾  
撒納俟赤倫事竣回營一面馳奏一面即傳朕旨  
賞給赤倫副都統職銜以示鼓勵  
命郡王品級貝勒青滾雜卜為喀爾喀副將軍

上諭軍機大臣曰據阿睦爾撒納奏貝勒策登扎卜  
呈稱身有殘疾懇求解任策登扎卜人本平庸今  
既病廢求退著革去副將軍任郡王品級貝勒青  
滾雜卜著補授喀爾喀副將軍

庚寅

命豫備汗哈屯烏梁海等游牧事宜

上諭軍機大臣曰昨據阿睦爾撒納奏遣赤倫前往  
招服汗哈屯之烏梁海等想此時赤倫已到事亦

就緒厄魯特烏梁海人衆既於舊游牧處居住將來汗哈屯之烏梁海等投至或可照此辦理若必須遷移則與察達克等烏梁海游牧一同遷進俾新舊所收之人彼此連界居住亦可其宰桑等至軍營叩見將軍大臣時朕即加恩賞給品級遣回管理屬衆和托輝特郡王品級貝勒青滾雜卜熟悉烏梁海人情朕已派令照管著傳諭阿睦爾撒納會同青滾雜卜妥商辦理

辛卯

命郡王班珠爾公納噶查仍留北路軍營

副都統職銜唐祿奏言臣接奉

諭旨令班珠爾納噶查之兵調往西路隨傅和碩特  
郡王班珠爾公納噶查宣示

聖諭據班珠爾納噶查告稱我等與阿睦爾撒納俱  
在塔爾巴噶台博羅塔拉地方游牧彼處相識  
甚多若用阿睦爾撒納舊纛帶領進兵易於招

降且事成後若封阿睦爾撒納為汗哈薩克之  
諾顏阿布賚原係舊好我等遣使修睦帶領哈  
薩克數人瞻仰

天顏即令與阿睦爾撒納等連界居住從此當愈加  
和好伊等必深感激彼此俱得樂業乞為轉奏  
仍留北路奏入

上諭軍機大臣曰據唐喀祿奏班珠爾等懇請仍留  
北路先據薩喇爾奏班珠爾人甚去得而和碩特



兵又最勇健若與都爾伯特兵於西路同進實為  
有力是以降旨令其調往西路今班珠爾等既願  
留北路兼於進取事宜有益即著照伊所請仍與  
阿睦爾撒納前進準噶爾平定之後朕意將四衛  
喇特封為四汗俾各管其屬封策凌為都爾伯特  
汗阿睦爾撒納為輝特汗班珠爾為和碩特汗朕  
曾面諭策凌阿睦爾撒納二人第班珠爾尚未知  
悉可即諭伊知之再納噶查告稱將和碩特人移

住青海之處從前納噶查來熱河時朕降旨俟事成後或在原游牧或移居青海悉惟爾便並未諭令必移青海居住也此阿睦爾撒納默庫所共聞況朕方將封班珠爾為和碩特汗乃轉令伊舍舊地而移青海乎若納噶查不過一扎薩克或欲移住青海亦無不可俟事定後伊再具奏請旨班珠爾未來熱河而納噶查又誤傳朕旨著唐喀祿明白曉諭班珠爾等知之又奉

上諭曰唐喀祿奏班珠爾等願留北路一摺著抄寄  
班第薩喇爾知悉班珠爾兵少本不成隊伊既不  
願往西路朕已允其所請但朕觀納噶查為人狡  
詐喜事今所告唐喀祿之言有事成後封阿睦爾  
撒納為汗帶領哈薩克阿布賚等瞻仰令與阿睦  
爾撒納連界居住從此當愈加和好等語甚屬含  
糊似事成時祇封阿睦爾撒納為汗殊不知準噶  
爾平後朕亦不過將伊四衛喇特台吉分封為汗

今各管屬下而已並非祇封阿睦爾撒納一人統  
管準噶爾地方也若果如此是仍如達瓦齊矣試  
思朕之辦理此事果專為伊等乎伊等豫為此言  
試探是其所望甚賒若將來祇封阿睦爾撒納為  
輝特汗轉不免於失望班第薩喇爾可將封阿睦  
爾撒納為輝特汗其餘於三姓台吉內封為三汗  
之處於間中言及俾伊等熟聞庶幾妄念可消至  
阿睦爾撒納游牧在塔爾巴噶台果否與哈薩克

毗連若相距遙遠而為此說是欲借哈薩克以為  
擅權之地也伊等果知奮勉朕不惜格外加恩至  
專擅則斷乎不可著侍衛扎克蘇密齋此旨傳諭  
班第薩喇爾留心察看俟準噶爾既平阿睦爾撒  
納帶彼處頭目來時再將哈薩克之事會議請旨  
辦理

壬辰

協辦陝甘總督劉統勳等奏寧夏府知府趙

本植偷漏軍需馬匹草料

命革職拏問

劉統勲等奏言據寧夏道孔繼河稟查驗各處馬棚惟趙本植承餉烏蘭察卜馬匹最屬平常且聞草料有零星偷漏之弊臣等聞趙本植於督臣永常過寧夏時面懇承餉馬匹意必實心報効不意以軍需重務竟有虛冒風聲如侵肥入已固當按律治罪即胥役尅減亦罪無可逭

奏入得

旨馬匹關係軍行趙本植係承餽之員不能實心辦理即已有曠職守今該員復任草料偷漏以致馬匹膝分不足有悞軍需益屬罪無可逭當此軍興伊始即如此玩縱貽悞非嚴行治罪不足示懲趙本植著革職拏問交該督撫將侵肥偷漏情弊嚴行究訊如果侵肥屬實即應照軍法從事以為玩悞軍需者戒

議定出征官兵馬駝鹽菜等事宜

協辦陝甘總督劉統勳議奏酌給出征官兵馬駝鹽菜一摺得

旨軍機大臣議奏尋議此次進剿官兵務在輕裝減騎迅奏膚功現據北路副將軍阿睦爾撒納等將北路出征之將軍大臣及蒙古王公台吉官兵人等應得進剿馬駝統照舊例十分減二西北兩路事同一例應令該署督遵照辦理至鹽



菜銀兩跟役名數亦應照戶部核定及臣等原  
議辦理其道府廳及佐雜官員應領馬匹即如  
該署督所議酌量給放至所稱陝甘滿營出征  
之人有以領催委至叅佐領者不過擾其職銜  
俾得約束兵衆其應領馬駝請仍照各本銜給  
與查現經戶部奏以蒙古王公兼叅贊大臣者  
應得馬駝如本銜數多照本銜支給兼銜數多  
則照兼銜支給滿洲官兵事同一例一切應支

各項自應俱照現委之職但如驍騎校由兵拔  
補委署佐領階級尚不至懸殊若領催即係兵  
丁豈有委署至叅領之理或該署督行文訛錯  
抑或該都統誤行揀派如係誤派應令該署督  
即行知會改正另派奏入

上從之

定邊左副將軍阿睦爾撒納等疏奏新降包沁  
人等編旗管領事宜

阿睦爾撒納等奏言從前收服扎哈沁烏梁海  
人衆俱編旗分佐領將宰桑等授為總管照舊  
管理其屬今新降之包沁宰桑阿克珠爾可否  
授為總管之處出自

天恩再扎哈沁除總管外奉

旨將厄魯特侍衛喀喇巴圖魯阿玉錫授為翼領但  
包沁之人係回子種類別為一教若仍由厄魯  
特內選人為翼領令其管轄恐其教各殊易生

事端臣等酌議若蒙

恩授阿克珠爾為總管仍遵

旨將伊之得木齊收楞額等名色留存除分別補放  
佐領官員外不必另放翼領至包沁人等現有  
牲隻數萬可無庸另賞產業但伊等聞

天兵一到即便投降甚為恭順仰體

皇上懷柔至意照扎哈沁例就現在解到茶內酌撥  
一千封賞給以示鼓勵俟進卡倫後交努三將

伊等家口細查倘有貧乏必需接濟者再行酌  
辦奏入報

聞

訓飭定西將軍永常

上諭軍機大臣曰永常係滿洲大臣平日尚知奮勉  
是以命為將軍俾與薩喇爾盡心商酌集事今閱  
方觀承奏伊催趲自京起程之大隊兵丁則誤會  
朕從前催令哨探兵前進之旨何糊塗悖謬一至

此耶再劉統勲叅趙本植承餵馬匹偷漏草料一案有永常經過寧夏該府求派餵馬之語雖永常未必因其懇求即令承餵但以軍需重事不計其人可否輒照所求委派可見漫不經心著傳諭永常嗣後務遵朕旨諸事與薩喇爾商辦慎勿以已為將軍任意妄行再薩喇爾進兵永常不必同進務待衆兵齊集帶領前往毋得故違取罪

平定準噶爾方略正編卷五